

## Мақсад – суғурта хизмати сифатини ошириш

Жорий йилнинг 22 февраль куни Жиззах шаҳар Давлат солиқ инспекцияси биносида “Ташувчининг фуқаролик жавобгарлигини мажбурий суғурта қилиш тўғрисида”ги Ўзбекистон Республикасининг Қонуни юзасидан семинар мажлиси ўтказилди.

Ушбу семинар-йиғилишда «Ўзбекинвест» экспорт-импорт миллий суғурта компанияси Жиззах вилояти филиали директори – Ю.Пармонов, Жиззах вилоят ҳокимлиги, Темир йўлларида юк ва йўловчилар ташиш, Вилоят йўл ҳаракати хавфсизлиги бошқармаси, Ўзбекистон автомобиль ва дарё транспорти агентлиги Жиззах вилоят бўлими бошлиғи, «Azia Insurance» СК, «Ўзагросуғурта» АЖ, «Кафолат суғурта компанияси» АЖ, «Капитал суғурта» СК, «Алском» СК, «Универсал суғурта» СК, «Ишонч» суғурта компаниялари вакиллари ҳамда вилоятда йўловчи ташиш билан шуғулланаётган транспорт корхоналари масъул ходимлари иштирок этишди.

«Ўзбекинвест» экспорт-импорт миллий суғурта компанияси Жиззах вилояти филиали директори Ю.Пармонов сўзга чиқиб, ҳозирги даврда мамлакатимизда барча соҳалар каби суғурта соҳаси ҳам жадал ривожланиб, Ўзбекистон суғурта бозорида бугунги кунда реал иқтисодиётимиздаги ўсиш анъаналарига монанд равишда кўрсаткичлар сифат ҳам миқдор жиҳатидан ўсиб, суғурта бюджетдан ташқари бўлган ва энг оғир, кутилмаган ҳолатларда халқ хўжалигига, хўжалик юритувчи субъектларга ва жисмоний шахсларга молиявий кўмак бўлувчи тизим сифатида миллий иқтисодиётимизда ўз ўрнини муҳим эгаллаб бораётганлигини таъкидлади.

Ҳудди шундай семинарлардан бири 23 феврал куни, “Kafolat суғурта компанияси” АЖ мажбурий суғурта департаменти бош менеджери ҳамда вилоятда фаолият кўрсатаётган суғурта компаниялари масъул ходимлари, Ўзбекистон автомобиль ва дарё транспорти агентлиги Самарқанд вилоят ҳудудий бўлими ходимлари, вилоятдаги шаҳар ва шаҳар атрофида йўловчи ташувчи автокорхона раҳбарлари ҳамда оммавий ахборот воситалари вакиллари иштирокида “Ташувчининг фуқаролик жавобгарлигини мажбурий суғурта қилиш” тўғрисидаги Ўзбекистон Республикаси Қонуни ижроси юзасидан ўтказилди.

Семинарда “Kafolat суғурта компанияси” АЖ мажбурий суғурта департаменти бош менеджери Д.Ўринов, сўзга чиқиб, суғурта деганда юридик ёки жисмоний шахслар тўлайдиган суғурта мукофотларидан, шунингдек суғурталовчининг бошқа маблағларидан шакллантириладиган пул фондлари ҳисобидан муайян воқеа (суғурта ҳодисаси) юз берганда ушбу шахсларга суғурта шартномасига мувофиқ суғурта товонини (суғурта пулини) тўлаш йўли билан

уларнинг манфаатларини ҳимоя қилиш тушунилиши, мамлакатимизда фуқаролар томонидан бошқа шахсларнинг ҳаёти, соғлиғи ёки мол-мулкига етказилган зарарларнинг ўрнини қопланишини кафолатлаш мақсадида мажбурий суғурта амалиётга жорий этилганлиги тўғрисида тушунтириб ўтди.

Ўзбекистон Республикасининг 2015 йил 26 майдаги «Ташувчининг фуқаролик жавобгарлигини мажбурий суғурта қилиш тўғрисида»ги 386-сонли Қонунининг мақсади ташувчининг фуқаролик жавобгарлигини мажбурий суғурта қилиш соҳасидаги муносабатларни тартибга солишдан иборатлиги, ташувчи йўловчиларнинг ҳаёти, соғлиғи ва (ёки) мол-мулкига зарар етказганлик учун ўз фуқаролик жавобгарлигини ташиш бўйича хизматлар кўрсатиш бошлангунига қадар, ушбу Қонунда белгиланган шартлар асосида ва тартибда суғурталаш шартлиги, агар ташувчиларнинг фуқаролик жавобгарлиги Ўзбекистон Республикасининг халқаро шартномалари талабларига мувофиқ ташувчининг фуқаролик жавобгарлигини мажбурий суғурта қилиш юзасидан белгиланган суғурта пулидан кам бўлмаган миқдорда суғурталанган бўлса, уларга нисбатан ташувчининг ўз фуқаролик жавобгарлигини суғурта қилиш мажбурияти татбиқ этилмаслиги тўғрисида тушунтириб ўтди.

Йиғилишда қатнашган «Зиадин авто сардор» МЧЖ раҳбари Н.Ахназаров, «Алишоҳ транс сервис» МЧЖ раҳбари А.Рахимов, «Баҳора автойўловчи транс» МЧЖ раҳбари А.Эргашев, «Гаппар транс» МЧЖ раҳбари С.Жўракулов ҳамда «Диамонд оригинал» МЧЖ раҳбари А.Ибодовлар томонидан суғурта муддатини 1 йиллик эмас, балки лицензия варақаси муддатигача бериш, ҳайдовчига етказилган зарар бўйича ҳеч қандай имтиёз йўқлиги ҳамда транспорт воситаси суғурта қилингандан кейин иккинчи марта қандай имтиёзлар берилиши мумкин деган саволларига «Kafolat суғурта компанияси» АЖ мажбурий суғурта департаменти бош менеджери Д.Ўринов томонидан тўлиқ жавоблар берилди.

Кун тартибидаги барча масалалар бўйича семинар қатнашчилари ўзларини қизиқтирган барча саволларга ижобий ва тўлақонли жавоблар олишди.

Ўзбекистон автомобиль ва дарё транспорти агентлиги Ахборот хизмати